

Nappaatit suut napparsimasut sivikitsumik piffissamiluunniit aalajangersimasumik sivilissusiligaanngitsumi Danmarkiliarlutik katsorsartikkiartortariaqalertanerannik kinguneqartarnersut pillugit Naalackersuisut UPA2019-mi nassuiaammik saqqummiussinissaat pillugu Inatsisartunut aalajangiiffigisassatut siunnersuut. Nassuiaammi aningaasatigut nakorsaanikkullu periarfissat suut ungasinnerusoq isigalugu napparsimasunik Danmarkimut katsorsartikkiartortunik ikilisitsisinnaasut ilanngunneqassapput.

(Inatsisartunut ilaasortamit, Aqqaluaq B. Egede, Inuit Ataqtigiit, saqqummiunneqartoq)

pillugu

Ilaqtariinnermut Peqqissutsimullu Ataatsimiititaliap

siunnersuutip aappassaaneerreqarneranut

ISUMALIUTISSIISUTAA

Ataatsimiititaliap suliarinninnermini makku ilaasortarai:

Inatsisartunut ilaasortaq Laura Táunâjik, Siumut, siulittaasoq
Inatsisartunut ilaasortaq Stine Egede, Inuit Ataqtigiit, siulittaasup tullia
Inatsisartunut ilaasortaq Jess Svane, Siumut
Inatsisartunut ilaasortaq Aqqaluk Heilmann, Atassut
Inatsisartunut ilaasortaq Malene Vahl Rasmussen, Demokraatit
Inatsisartunut ilaasortaq Mikivsuk Thomassen, Inuit Ataqtigiit
Inatsisartunut ilaasortaq Aqqa Samuelson, Inuit Ataqtigiit

UKA 2018-imi ulloq 29. oktober 2018-imi siullermeerinninnerup kingorna ataatsimiititaliap siunnersuut sukumiisumik misissorpaa.

Siunnersuutip imarisaa siunertaalu

Napparsimasut nunatsinneersut sivikinnerusumik sivilissusiligaanngitsumi Danmarkimut nakorsartikkiartortariaqalernerannut suut nappaatigisarneraat UPA 2019-imut Naalackersuisut nassuiaasioqqullugit aalajangiiffigisassatut siunnersuut Inatsisartunit taparserneqarnissaa matumani siunnersuuteqartup kissaatigaa.

Napparsimasut Danmarkimi nakorsartikkiartorlugit aallartinneqartartut ikilisinneqarnissaat siunertaralugu siumut isigisumik aningaasatigut nakorsaatinullu periarfissat nassuiaammi ilanngullugit Naalackersuisut allaaserissagaat taamatuttaaq siunnersuuteqartoq kissaateqarpoq.

Siunnersuutip Inatsisartunit siullermeerneqarnera

Siunnersuummut akissuteqaammi Naalackersuisut imaattumik allannguutissatut siunnersuummik saqqummiussaqaqput:

“Nappaatit suut napparsimasut sivikitsumik piffissamiluunniit aalajangersimasumik sivirususiligaanngitsumi Danmarkiliarlutik katsorsartikkiartortariaqalertanerannik kinguneqartarnersut pillugit Naalackersuisut UKA2019-mi nassuiaammik saqqummiussinissaat pillugu Inatsisartunut aalajangiiffigisassatut siunnersuut. Nassuiaammi aningaasatigut nakorsaanikkullu periarfissat suut ungasinnerusooq isigalugu napparsimasunik Danmarkimut katsorsartikkiartortunik ikilisisinnaasut ilanngunneqassapput.”

Partiinit tamarmik Demokraatit pinnatik siunnersuut tapersorpaat. Peqqinnissaqarfimmi sulisunut tunngatillugu sulisussarsiornermi ajornartorsiutip aaqinneqarnissaanut peqqinnissaqarfimmi sulisoqarniarnerup salliutinneqarnissaa Demokraatit kissaatigaat. Nunatsinni peqqinnissaqarfimmi sulisussarsiornissaq siunertaralugu pitsaanerusumik aaqqiissuteqartoqartariaqarpoq, taamaalilluni inuit ikinnerusut nunatta avataanut nakorsartikkiartornerannik kinguneqassammat.

Tamanna tunngavigalugu siunnersuut Ilaqutariinnermut Peqqissutsimullu Ataatsimiititaliami suliarineqartussanngorlugi innersuunneqarpoq.

Ataatsimiititaliap siunnersuummik suliarinninnera

Siunnersuuteqartup siunnersuutigisaatut naalackersuinikkut qanoq nalunaarusiortoqassanersoq kiisalu Naalackersuisunit, siunnersuummut isumaqataasunit, siunnersuutigineqartutut UPA 2019-imi imaluunniit UKA 2019-imi nalunaarusiaq saqqummiunneqassanersoq ataatsimiititaliamit isummerfigineqassaaq.

Nunatsinni peqqinnissaqarfimmi sulisussarsiornermut tunngatillugu ajornartorsiuteqarneq ataatsimiititaliamit ilisimaneqarpoq.

Nunatsinni peqqinnissaqarfiup unammilligassai ataatsimiititaliamit malinnaaffigeqqissaarneqarput, ataatsimiititaliamiillu piffissaq sivikinnerusooq ungasinnerusorlu isigalugit kinguneqarluartumik aaqqiissutissamik suliaqartoqarnissaa innersuussutigineqarluni, taamaaliornikkut nunatsinni peqqinnissaqarfiup

unammilligassaminut ingerlaavartumik naammassinnissinnaaqullugu, aammalu nunatsinni innuttaasut nakorsarneqartarnissaasa sapinngisamik annertunerpaamik qulakkeerneqarsinnaaqullugu. Peqqinnissamut tunngasuni avataaneersunik suleqateqarnissaq sulisunni pisariaqarpoq.

Nunatsinni peqqinnissaqarfimmi pisariaqartinneqartumik sulisunik tigumminnissinnaasoqanngippat sulisussarsiortoqanngippallu peqqinnissaqarfiup nunatsinni innuttaasunik sullissinini annaasussaavaa.

Nalunaarusiarineqartussatut kissaatigineqartup kingusinnerpaamik UKA 2019-imi saqqummiunneqassappat ataatsimiititaliami namminermi akerlerineqanngilaq.

Sukumiisumik sulineq pingaarnerpaassaaq, peqqinnissaqarfimmi sulineq pingaartilluinnartariaqarpoq.

Siunnersuutip aningaasatigut kingunerisassai

Inatsisartut suleriaasianni § 33 imm. 1-imi allassimavoq aalajangiiffigisassatut siunnersuutip aningaasatigut allaffissornikkullu kingunerisassai siunnersuummi tunngavilersorneqarsimassasut.

Siunnersuutip piviusunngortinneqarnerani aningaasatigut kingunerisassat oqaatigineqartunut siunnersuutigineqartoq naapertuuttoq ataatsimiititaliamit maluginiarneqarpoq, tamatuma kingorna sulisunut atorneqartussat 250.000 kr.-it nalinginik matussuserneqassallutik.

Saqqummiunneqartut ataatsimiititaliamit tusaatissatut tiguineqarput.

Ataatsimiititaliap inassuteqaatai

Ataatsimiititaliami amerlanerussuteqartut Siumut, Inuit Ataqtigiit aamma Atassut ima oqaaseqaateqarput:

Peqqinnissaqarfiup nunatsinni innuttaasunik sullissinissaa pingaaruteqarpoq, taamaattumik siunnersuummi pineqartumi naalakkersuinikkut takorluukkat piviusunngortinneqarnissaannut takorluuisinnaassuseqarnissaq, takorluukkat piviusullu ataqtigiinnissaat ilanngullugu qulakkeerneqarnissaat pingaaruteqarpoq. Siunnersuutigineqartup amerlanerussuteqartunit tapersorneqarneranut nunatsinni peqqinnissaqarfiup sulisoqarniarneranut tunngatillugu kinguneqarluartumik ungasinnersumullu isigisumik aaqqiissutissamik nassaarniarnermut sulinerup ingerlaannarnissaanut siunnersuummut amerlanerussuteqartut tapersersuinerannut allanngortitsinngilaq. Nalunaarusiassatut siunnersuutigineqartup UKA 2019-imi saqqummiunneqarnissaanut amerlanerussuteqartut utaqqisinnaapput, ataatsimut isigalugu

nalunaarusiaq nunatsinni innuttaasunut tamakkiisumik innuttaasunullu immikkut nakorsarneqarnissamik pisariaqartitsisunut pingaartumillu neqeroorutit eqqarsaatigalugit iluaqutaasussaammata.

Tamanna tunngavigalugu Naalakkersuisut saqqummiussaaf allannguutissatut siunnersuut akuerineqassasoq siunnersuutaaqqaartorlu itigartinneqassasoq ataatsimiititaliami amerlanerussuteqartut Siumumeersut, Inuit Ataqatigiinneersut aamma Atassummeersut inassutigaa.

Ataatsimiititaliami ikinnerussuteqarlutik ilaasortaataat Demokraatineersoq ima oqaaseqarpoq:

Amerlanertigut nunatsinni illutatigut nutaaliaasunik ingerlalluuartunillu peqqissaaveqarpugut. Nunatta inissisimanager assissaqanngilaq, sumiinnerlu apeqqutaatillugu innuttaasut ataasiakkaat peqqinnissaqarfip sullississutaanut tamanut qanoq qanitsigisumik inissisimanagerat soorunami aamma assigiinngissuseqarsinnaalluni. Napparsimasunut qanoq qanitsiginissamut oqimaaqatigiissaarinerput oqaluuseriuannarneqarsinnaavoq, aamma illoqarfinni, nunap immikkoortuini nunalu tamakkerlugu neqerooruteqartoqassanersoq.

Peqqinnissaqarfimmi ullumikkut unamminarnerpaaq tassaavoq sulisussarsiortarneq. Tamanna nutaajunngilaq, ullumikkulli annertusiartuinnarluni, kingullertigut Peqqinnissaqarfik Diskomi pisariaqartinneqarluinnartumik aalajangersimasumik nakorsaqannginnera kinguneqarnerluppoq. 2018-p aasaanerani Nuummi Dronning Ingridip Napparsimavissuani aasaanerani sulisut ikilisillugit ingerlanneqarnerata saniatigut innanngavinnik matusisoqarpoq. Tamakku napparsimasut innanngaviini allanilu nakorsanik tigungminniinnarsinnaanermik sulisussarsiortarnermilu ajornartorsiuteqarnerup kingunerivai. Nunatta sinnerani aamma taama eqqugaasoqarpoq, taamaattumik tamakku kinguneri innuttaasunit tamanit qanimut malugineqartarput.

Peqqinnissaqarfip nunatsinni innuttaasunik ingerlaavartumik sullissinermi saniatigut sulisunik tigungminniinnarnissaminut sulisussarsiortanermullu annertuumik suliniuteqarnermini nukini tamaasa atussagai Demokraatit kissaatigaa, taamaaliornikkut nunatsinni innuttaasut sullinneqarnerannut atatillugu pitsanngorsaasoqarsinnaaqqullugu. Taamaaliortoqarpat piffissaq sivikitsoq ungasinnerusorlu isigalugit innuttaasunut pitsaasumik kinguneqassamat. Napparsimasut eqqarsaatigalugit arlalitsigut nunanik allanik suleqateqarneq ingerlanneqartuutussaavoq, innuttaasunut napparsimasunullu pitsaanerpaassaaq peqqinnissaqarfimmi sulisoqarniarnikkut suut tamaasa atorlugit aaqqiiniartoqartariaqarpoq, taamaaliornikkut sapinngisamik amerlanerpaat angerlarsimaffimminnut sapinngisamik qaninnerpaami katsorsartissinnaaniassammata.

Siunnersuutip itigartinneqarneratigut napparsimasut nunanut allanut katsorsartikkiartorneqartartut amerlassusaaf ungasinnerusoq isigalugu appartinneqarnissaannik

kissaateqarnermut allannguivianngilaq, allatulli pingaarnersiuisoqartariaqarluni.

Piffissaq sivikitsoq sivilunerusorlu eqqarsaatigalugit takorluukkat periusissianngortinneqarnissaat kinguneqarluartumillu aaqiisoqarnissaanik, kiisalu nunap immikkoortuini pilersaarummik suliaqartoqarnissaa Demokraatit kaammattuutigaat.

Tamanna tungavigalugu siunnersuutigineqartoq allannguutissatullu siunnersuutigineqartoq itigartinneqassasut ikinnerussuteqarlutik ilaasortaataata Demokraatineersup inassutigaa.

Taama oqaaseqarluni isumaliutissiisummilu oqaatigineqartunut paasinnilluni siunnersuut ataatsimiititaliap aappassaaniigassanngortippaa.



Laura Táunâjik
Siulittaasoq



Stine Egede
Siulittaasup tullia



Jess Svane




Aqqaluk Heilmann



Malene Vahl Rasmussen



Mikivsuk Thomassen



Aqqa Samuelsen